

Kerajaan perlu sedia peruntukan besar urus kelestarian alam sekitar

- Kelestarian alam sekitar perlu dinyatakan secara jelas dan tersendiri di dalam Bajet 2023 tanpa diletak atau dirangkum bersama sektor lain

- Bajet 2023 tidak harus meminggirkan aspek penjagaan dan kelestarian alam sekitar dalam mengimbangi perkembangan ekonomi dengan kesejahteraan alam sekitar



Oleh Prof Madya Dr Haliza Abdul Rahman
bhrencana@bh.com.my

Pada kebiasaannya, pembentangan bajet tahunan kerajaan menumpukan kepada aspek pengukuhan ekonomi negara, menjana pertumbuhan perniagaan domestik dan paling penting meningkatkan kesejahteraan hidup rakyat.

Dalam tempoh dua tahun kebelakangan ini, bajet dibentangkan kerajaan menjurus ke arah pemulihan ekonomi negara dan memastikan kehidupan rakyat lebih terjamin akibat penularan pandemik COVID-19.

Setakat ini, lebih 30 cadangan dikemukakan kepada Majlis Konsultasi Bajet 2023 yang menyentuh aspek kehidupan rakyat, perniagaan, ekonomi dan kerajaan.

Menurut Kementerian Kewangan (MOF), antara topik utama diberi penekanan pada bajet tahun depan adalah menangani peningkatan kos sara hidup rakyat, pembangunan industri pertanian, penjagaan kesihatan awam, pelaksanaan subsidi bersasar dan meningkatkan kerjasama sektor awam, swasta dan sosial ke arah mensejahterakan Keluarga Malaysia.

Ternyata fokus utama Bajet 2023 masih lagi berteraskan kesejahteraan dan kebajikan rakyat segenap lapisan masyarakat. Ini termasuk penekanan terhadap aspek penjagaan kesihatan awam merangkumi perlindungan dan pemeliharaan persekitaran.

Namun, aspek kelestarian alam sekitar juga tidak boleh diabaikan dalam pembentangan Bajet 2023 nanti. Kelestarian alam sekitar perlu dinyatakan secara jelas dan tersendiri tanpa diletak atau dirangkum bersama sektor lain.

Kerajaan wajar meletakkan keutamaan terhadap pemeliharaan dan pemuliharaan alam sekitar negara di dalam Bajet 2023, sejajar penekanan terhadap kepentingan ekonomi dan pembangunan.

Hal ini selaras dengan pewartaan beberapa dasar utama ke arah Malaysia lebih lestari dan sejahtera termasuklah Dasar Alam Sekitar Negara, Dasar Perubahan Iklim Negara, Dasar Kepelba-

gaian Biologi Negara dan terbaru, Dasar Tenaga Negara di samping pelaburan ke arah teknologi hijau dan tenaga diperbaharui.

Tindakan jitu ini sangat dituntut kerana ia menunjukkan komitmen penuh dan padu kerajaan meningkatkan keterangkuman sosial dan kelestarian alam sekitar negara.

Tambahan pula, Program Pembangunan Pertumbuhan Bangsa-Bangsa Bersatu (UNDP) menerusi dokumen Laporan Pembangunan Manusia 1994 menjelaskan terdapat tujuh elemen dikategorikan sebagai dimensi baharu keselamatan manusia.

Ia merangkumi aspek keselamatan ekonomi, makanan, kesihatan, alam sekitar, peribadi, komuniti dan politik.

Jamin kualiti hidup manusia

Ketujuh-tujuh elemen ini saling berkait rapat, sama ada secara langsung mahupun tidak langsung. Ia juga mempunyai hubungan berbentuk 'sebab dan akibat' antara satu sama lain seperti kekurangan sumber air (keselamatan alam sekitar) boleh menjejaskan bekalan air bersih yang memberi kesan kepada kualiti hidup dan kesejahteraan kesihatan manusia sejagat.

Tindakan ini mampu menonjol dan melonjak usaha bersungguh-sungguh Malaysia dalam isu penjagaan alam sekitar di persada antarabangsa untuk mencapai sasaran ditetapkan di bawah Matlamat Pembangunan Mampan Pertumbuhan Bangsa-Bangsa Bersatu (UNSDG), khususnya menangani impak perubahan iklim kepada penguangan pelepasan gas rumah hijau.

Bagi mencapai ke arah pembangunan inklusif dan mampan juga, kepentingan terhadap alam sekitar tidak boleh dipandang remeh kerajaan.

Semua ini menuntut agenda pembangunan hijau diberi penekanan bagi memastikan perancangan pembangunan negara mengambil kira kelestarian alam sekitar.

Oleh itu, aspek pembangunan seperti ekonomi, peningkatan pendapatan rakyat, perpaduan, keselamatan dan kesihatan persekitaran antara agenda perlu diangkat kerajaan.

Lantaran itu, kerajaan 'berbelanja besar' bagi menangani pelbagai aspek pengabaian, pencemaran dan kemusnahan alam sekitar pihak tertentu.

Maka, aspek pendidikan alam sekitar bagi membangkit kesedaran berterusan masyarakat terhadap usaha melestarikan alam sekitar juga memerlukan peruntukan bukan sedikit.

Namun, usaha ini sangat penting supaya pada masa hadapan, kesedaran tinggi masyarakat dalam melindungi alam sekitar kelak menjadi faktor kerajaan tidak perlu memperuntukkan kos tinggi bagi membaik pulih alam sekitar yang terjejas dan tercemar. Sebagai contoh, pada 2021, pembersihan Sungai Semenyih membabitkan kos pembersihan RM8 juta, manakala pencemaran Sungai Kim Kim pula membabitkan kos RM6 juta.

Kos tinggi tangani bencana

Sementara itu, negara turut terdedah dengan ancaman bencana alam ekstrem seperti tanah runtuh, banjir, angin kencang dan kemarau. Semua ini menelan kos tinggi untuk dibaik pulih, dirawat dan membantu mangsa kehilangan harta benda dan nyawa ahli keluarga.

Kerosakan harta dan kemudahan komuniti disebabkan banjir juga meningkatkan kos kerugian kepada kerajaan dan pada masa sama boleh memberi kesan relatif terhadap ekonomi negara.

Bencana banjir seperti melanda Lembah Klang pada 18 Disember 2021 dianggap menyebabkan kerugian sekurang-kurangnya RM20 bilion.

Kementerian Alam Sekitar dan Air (KASA) menganggarkan memerlukan peruntukan sebanyak RM392 bilion sebagai langkah jangka panjang mengatasi masalah banjir di negara ini sehingga 2100. Maka kerajaan perlu memberi perhatian khusus terhadap aspek ini dalam penyediaan Bajet 2023.

Pada Bajet 2021, MOF mencadangkan peruntukan sejumlah RM4.172 bilion untuk melestarikan alam sekitar dan air. Peruntukan kepada KASA ini meningkat 20.09 peratus berbanding peruntukan tahun 2020.

Pada Bajet 2022 pula, kerajaan memperuntukkan sejumlah RM450 juta bagi pemuliharaan dan pemeliharaan alam sekitar serta biodiversiti dan penerbitan Sukuk Kelestarian bernilai RM10 bilion bagi mencapai strategi pembangunan mampan negara.

Antara inisiatif tumpuan adalah projek pemeliharaan alam seperti *Penang Hill Biosphere Reserve* dan *Tasik Chini Reserve* serta projek pemuliharaan alam menangani hakisan pantai di Pantai Merdeka di Kedah, mengatasi banjir di Melaka dan pemberian bantuan kos meningkatkan pembiakan Harimau Malaya serta Kempen Penanaman 100 juta Pokok.

Sementara itu, krisis perubahan iklim dijangka memberi kesan serius terhadap kesejahteraan hidup rakyat menyebabkan kerajaan perlu mengambil langkah awal memastikan kesiapsiagaan sepenuhnya dan infrastruktur lengkap bagi menghadapi fenomena ini bagi meminimumkan pelbagai kos berkaitan.

Justeru, Bajet 2023 yang akan dibentangkan pada 7 Oktober ini tidak harus meminggirkan aspek penjagaan dan kelestarian alam sekitar dalam mengimbangi perkembangan ekonomi dengan kesejahteraan alam sekitar. Apatah lagi penjagaan alam sekitar adalah mustahak bagi memastikan kesihatan dan kesejahteraan masyarakat terjamin.

